

BBO

DESPUES DI SEIS LUNA

RIBA PROMER DI JANUARI 2007, E LEY DI BBO A DRENTA NA VIGOR. CON NOS TA PARA CU BBO DESPUES DI MITAR AÑA DI SU INTRODUCCION.

ENTRADANAN DI BBO

A base di e entradanan di BBO di e ultimo lunanan, e pronostico ta cu e entradanan di BBO den 2007 lo yega te mas o menos Afl. 145 milyon. Esey ta hopi cerca di e pronostico di Directie Economische Zaken den su rapport di 2006. E pronostico aki tabata Afl. 129 milyon. E suma di Afl. 145 milyon no ta inclui e suma cu Valero mester paga riba su benta. Valero tin e opinion cu nan no mester paga BBO pasobra nan tin un tax holiday. E caso Aruba contra Valero lo wordo dicidi probablemente dor di huez.

INFLACION

Riba dia promer di juni 2007, e inflacion anual tabata 3,8%. E porcentahe aki ta inclui e "inflacion normal", cu ta e inflacion cu lo a presenta tambe si e BBO no a wordo introduci. Aña 2007 no a caba ainda, pero e ta parce cu e inflacion den 2007 lo yega na un porcentahe menos cu diferente organisacion a pronostica. Varios oponente a duna un pronostico di no menos cu 15%. E ta parce cu e inflacion di 2007 lo yega hopi cerca di loke Directie Economische Zaken a pronostica. E departamento aki a pronostica un porcentahe di 3,1%. Esaki tabata e inflacion dor di introduccion di BBO, anto sin e inflacion normal. Nos no

mester lubida cu e ciudadanonan registra na Aruba a saca probecho di e reduccion di e tarifa di loon- y inkomstenbelasting entrante promer di januari 2007. Esey tabata pa compensa e inflacion dor di introduccion di BBO (y no pa compensa e inflacion normal). E compensacion aki no a tuma lugar na Hulanda of Corsow ora cu e BTW (tarifa 2007: 19%) respectivamente OB (tarifa 2007: 5%) a drenta na vigor den pasado.

CONTROL DI BBO

E control di BBO ta relativamente facil, pasobra solamente e entradanan di benta mester wordo controla pa stipula cuanto BBO mester wordo paga. E gastonan no ta hunga un rol pa calculacion di BBO. E ta dificil pa evadi BBO. E unico posibilidad pa evadi BBO ta pa no menciona e entradanan di benta. Den principio, esey ta fraude di impuesto y por wordo castiga cu un but di 100% of 4 aña di prison.

SIAD a realisa mas cu 250 control caba. E comerciantenan a ricibi un bisita di e team di control di SIAD. Un gran parti di e comerciantenan a haya e control di BBO positivo, pasobra e controlnan aki tambe tabatin un tarea di instruccion. E controlnan di BBO lo sigui. Tur e comerciantenan lo wordo controla den e siguiente lunanan, di un comerciante grandi te cu un comerciante chikito, di un hotel te cu un bendedor riba un mercado.

FUTURO DI BBO

E futuro di BBO ta positivo. Den futuro pueblo lo mira cu e cambio di e

sistema fiscal dor di introduccion di un impuesto riba benta, lo ta un di e mihor cambionan den historia fiscal di Aruba. Nos ta biba den un sociedad di consumo y un impuesto riba benta ta un sistema ideal pa un sociedad asina. E benta mas grandi di un impuesto riba benta ta cu tur hende ta contribui na e caha di gobierno. E ilegalnan y e otro ciudadanonan y e comerciantenan cu no ta paga loon-, inkomsten- y winstbelasting, pasobra nan ta traha den e mercado preto, tambe ta bay paga impuesto. Por ehemplo nan tambe mester haci compra den supermercado. Esaki ta conta tambe pa e grupo di turista cu ta paga loon-, inkomsten- y winstbelasting den su propio pais. E ta husto cu e dos gruponan aki tambe ta contribui na e caha di gobierno, pasobra nan tambe ta haci uzo di e facilidatnan publico (p.e. e carretera nan y seguridad di polis). E ciudadanonan y e comerciantenan registra na Aruba lo ta e ganadonan di e cambio aki den futuro, pasobra dor di introduccion di BBO e porta ta habri pa reduci mas e tarificanan di loon-, inkomsten- y winstbelasting. ■

Tin storia den comunidad cu e tarifa di BBO lo subi te 5% of 6% riba 1 di januari 2008. E storianan aki ta contrario na berdad. E tarifa di BBO lo ta 3% den aña 2008.

**Benno Oldenhof (36) a gradua cum laude den Fiscaal Recht na Universidad di Amsterdam na Hulanda. Benno tambe tin un grado post-Universitario den Fiscaal Recht. Desde 1999 te cu 2005, el a traha como fiscaal jurist den sector priva (KPMG, Ernst & Young) na Hulanda, Antiya y Aruba. Desde 2005, e ta traha como fiscaal jurist na Directie der Belastingen.*

